

- केन्द्रीय कृषि मंत्री शिवराज सिंह चौहान कह्यो—नकली बीज अर नकली दवाइयां बेचण वाळां रे खिलाफ कार्रवाई सारु सरकार कानून बणावेला।
- केन्द्रीय पर्यावरण मंत्री भूपेन्द्र यादव कह्यो—अरावली हलको संरक्षित—कांग्रेस माथे ई बारा मांय भ्रम फैलावण रो आरोप मांड्यो।
- राष्ट्रपति द्रौपदी मुर्मू आज नई दिल्ली मांय राष्ट्रीय विज्ञान पुरस्कार दीना।
- प्रदेश मांय आज संवारे ई न्यारा—न्यारा जिलां मांय धुंअर रे कारण जिन्दगी माथे असर पड़्यो।

000

केंद्रीय कृषि मंत्री शिवराज सिंह चौहान कह्यो है के नकली बीज अर नकली दवाइयां बेचण वाळां माथे काबू करण सारु बेगो ई कानून बणायो जावेला। श्री चौहान आज नागौर जिला रा **मेड़ता** मांय राखी ज्या राज्य स्तर रा किसान सम्मेलन मांय बोल रह्या हा। श्री चौहान कह्यो के प्रधानमंत्री आवास योजना रा तैत 15 हजार रुपया ताई री आमदनी वाळां ने ई मकान दियो जावेला। वे राज्य मांय प्रधानमंत्री ग्राम सड़क योजना सारु 2 हजार करोड़ रुपया ऊं बत्ती रकम री मंजूरी ई दीनी। वे कह्यो के ई योजना री न्यारी—न्यारी शर्ता मांय छूट दी जावेला। श्री चौहान कह्यो के सरकार प्रधानमंत्री फसल बीमा योजना री कमियां आगी करण री कोशिश कर रही है।

केंद्रीय मंत्री कह्यो के विकसित भारत जी राम जी योजना मांय मजूरां रा भला अर किसानां रो ध्यान राखी ज्यो है। वे कह्यो के ई बारा मांय फैलाई जा रहीं नकारात्मक बातां बेबुनियाद है। श्री चौहान कह्यो के सरकार खेती—बाड़ी ने फायदा रो सौदो बणावण माथे खास ध्यान दे रही है। वे कह्यो के जंगली जिनावरां रे कारण साखां ने व्हेवण वाळा नुकसान ने ई बीमा रा दायरा मांय लायो जावेला। कार्यक्रम मांय मुख्यमंत्री भजन लाल शर्मा कह्यो के राज्य सरकार किसानां, नौजवानां, महिलावां अर मजूरां ने आगे बधावण अर मजबूत बणावण सारु लगातार काम कर रही है।

सम्मेलन मांय खेती—बाड़ी अर उद्यानिकी ऊं जुड़ी न्यारी—न्यारी योजनावां रा तैत मदद री रकम संबंधित लोगां रा खातां मांय भेजी ज्यी। ई सागे ई नागौर जिला मांय 351 करोड़ रुपया रा खर्च वाळा विकास रा कामां रो उद्घाटन कीनो अर नुवा कामां री सरुआत करी ज्यी।

000

देश रा पैली वाळा प्रधानमंत्री अर भारत रत्न ऊं नवाजी ज्या किसान नेता चौधरी चरण सिंह ने आज वां री जयंती रे मौके सिरधाभाव सागे याद कर्या जा रह्या है। वां री जयंती राष्ट्रीय किसान दिवस रा तौर ऊं मनायी जा रही है। प्रधानमंत्री नरेन्द्र मोदी सोशल मीडिया पोस्ट रे जरिये कह्यो के चौधरी चरण सिंह समाज रा वंचित तबका री जनता रा भला सागे खेती—बाड़ी री बरकत अर किसानां री बेहतरी सारु जिन्दगी लगा दीनी। केंद्रीय कृषि मंत्री शिवराज सिंह चौहान अर मुख्यमंत्री भजनलाल शर्मा ई चौधरी चरण सिंह ने सिरधाभाव सागे याद कीना। प्रदेश मांय ई मौके भांत—भांत रा कार्यक्रम राखी ज्या। पाली रा कृषि विज्ञान केन्द्र परिसर मांय खास कार्यक्रम राख र चरण सिंह ने याद करी ज्या।

000

केंद्रीय वन अर पर्यावरण मंत्री भूपेन्द्र यादव कांग्रेस माथे अरावली रा मुद्दा माथे भरमावण रो आरोप मांड्यो है। वे आज कोटपूतली—बहरोड़ मांय खबरनवीसां सागे बातचीत कर रह्या हा। वे कह्यो के अरावली री पहाड़ियां रा हलका मांय खुदाई नीति रे मुजब करी जावेला। वे कह्या के जंगलात हलका ने किण ई भंत रो नुकसान नी व्हेवण दियो जावेला अर खुदाई पाछे ई खाली जमीं माथे अब हरियाली

रेहवेला। श्री यादव बहरोड़ रा नारायणी देवी कॉलेज मांय पुस्तक विमोचन कार्यक्रम अर विचार गोष्ठी मांय ई शामिल व्ह्या।

000

विधानसभा री सदाचार समिति विधायक निधि ऊं खर्च करण रा काम मांय कथित तौर ऊं कमीशन मांगण रा आरोपित तीन ई विधायकां ने ओजू पूछताछ सारू बुलाया है। कमेटी खींवर ऊं भाजपा रा रेवंतराम डांगा, हिंडौन ऊं कांग्रेस री अनिता जाटव अर बयाना ऊं निर्दलीय विधायक ऋतु बनावत ने नोटिस जारी कर र 6 जनवरी ने समिति सामी पेश व्हेवण सारू कह्यो है। सदाचार समिति री आज जयपुर मांय व्ही मीटिंग पाछे इण रा अध्यक्ष कैलाश वर्मा खबरनवीसां ने बतायो के ज़रूरत पड़्यां स्टिंग रा वीडियो ने एफएसएल जांच सारू भेज्या जा सके है। श्री वर्मा कह्यो के तीन्यू विधायकां ने वां कानी ऊं मांगी ज्यी मोहलत देता थकां ज़रूरी सबूत, कागजात अर ऑडियो-वीडियो सागे पूरी तैयारी ऊं समिति सामी पेश व्हेवण बाबत नोटिस दियो ज्यो है।

000

राष्ट्रपति द्रौपदी मुर्मू आज राष्ट्रपति भवन मांय राख्यी ज्यो जळसा मांय राष्ट्रीय विज्ञान पुरस्कार-2025 दीना। विज्ञान, प्रौद्योगिकी अर नवाचार रा हलका मांय असाधारण योगदान देवण वाळां ने दियो जावण वाळो ओ देश रो सब ऊं ऊंचो मान है। पद्म विभूषण ऊं नवाजी ज्यो प्रोफेसर जयंत विष्णु नारलिकर ने मर्यां पाछे विज्ञान रत्न पुरस्कार दियो ज्यो। आठ वैज्ञानिकां ने विज्ञान श्री अर 14 वैज्ञानिकां ने विज्ञान युवा श्रेणी रा तैत नवाजी ज्यो, जदके विज्ञान रा हलका मांय टीम पुरस्कार अरोमा मिशन सी एस आई आर ने दियो ज्यो।

000

राज्यपाल हरिभाऊ बागडे कह्यो है के जनता कानी ऊं देशी सामान काम लेवण परां ई देश खुद रे पाण ऊबो व्हे सकेला। वे आज चित्तौड़गढ़ मांय राष्ट्रीय स्वदेशी महोत्सव रा उद्घाटन जळसा मांय बोल रह्या हा। श्री बागडे कह्यो के देशी सामान काम लेवण मांय बधोतरी ऊं परदेशी सामान माथे निर्भरता कम व्हेला, जिण ऊं देश री माली व्यवस्था मजबूत बणेला। 28 दिसम्बर ताई चालण वाळा ई महोत्सव मांय 300 ऊं बत्ती स्टॉलां रे जरिये देश रा न्यारा-न्यारा राज्यां रा स्टार्टअप्स अर कारोबारी वां रा सामान रो दरसाव कर रह्या है।

000

केंद्रीय मंत्री गजेंद्र सिंह शेखावत आज भीलवाड़ा जिला रा शाहपुरा कने देवखेड़ा गांव मांय स्वतंत्रता सेनानी केसरीसिंह बारहठ री मूरत रो अनावरण कीनो। ई मौके वे कह्या के बारहठ रो **राष्ट्रप्रथम** यानि देश सब ऊं पैली रो संदेश आज ई काम रो है। वे शाहपुरा मांय डिजिटल लाइब्रेरी खोलण रो ऐलाण ई कीनो।

000

प्रदेश मांय बड़ा दिन अर नुवा साल री तैयारियां करी जा रही है। बड़ा दिन रे मौके न्यारा-न्यारा गिरिजा घरां मांय प्रार्थना सभावां राख्यी जावेला अर कैरल्स गाया जावेला। क्रिसमस री छुट्टी ने ध्यान राखता थकां न्यारी-न्यारी ठौड़ां सैलाणी ई पूगण लाग्या है। म्हाणा सवाईमाधोपुर खबरनवीस बतायो के जिला रा रणथंभौर मांय मोटी तादाद मांय देशी-परदेशी सैलाणी पूग रह्या है।

000

प्रदेश रा दस ऊं बत्ता जिलां मांय आज संवारे ई धुंअर रही। सरहदी हलकां मांय केई ठौड़ां 30 मीटर ऊं आगे निजर नी आयो, जिण ऊं आवण-जावण माथे असर पड़्यो। ई बीचे आज संवारे सीकर जिला रा फतेहपुर मांय घणा कोहरा रे कारण स्कूल बस अर एंबुलेंस टकरा जावण ऊं एंबुलेंस चलावण वाळा री मौके ई मौत व्हे ग्यी। ई बीचे मौसम विभाग ऊं मिली जाणकारी रे मुजब सब ऊं कम 7 दशमलव 7 डिग्री सेल्सियस न्यूनतम तापमान माउंट आबू मांय दर्ज करी ज्यो। महकमा रे मुजब ई सप्ताह कम-ती-कम तापमान मांय खास बदलाव रा आसार नी है, हालांकि आवता चौबीस घंटां मांय केई ठौड़ा धुंअर रेहवण री शंका है।

000

खनन हलका रा काम अर नुवा तरीकां री जाणकारी हासिल करण सारू खान अर भू-विज्ञान विभाग रा आला अहलकारां रो दल उड़ीसा, मध्यप्रदेश अर छत्तीसगढ़ रो दौरा करेला। विभाग रा प्रमुख सचिव टी. रविकान्त आ जाणकारी दीनी। वे बतायो के अ अहलकार न्यारा-न्यारा राज्यां मांय तकनीक काम लेवण, आमदनी मांय बधोतरी अर नियमां री जाणकारी कर र राज्य सरकार ने रपट पेश करेला।

चूरु जिला रा तारानगर मांय सरकारी उप जिला अस्पताल बनायो जावेला। भारतीय जनता पार्टी रा प्रदेश अध्यक्ष मदन राठौड़ अर राज्य रा पैली वाळा मंत्री राजेन्द्र राठौड़ इण रा काम री नींव रखी। ई मौके राठौड़ कह्यो के राज्य सरकार प्रदेश मांय विकास रा काम करा र जनता ने साता दे रही है।

000

बीकानेर रा महाराजा गंगा सिंह विश्वविद्यालय रो दीक्षान्त समारोह काल राख्यो जावेला। इण मांय विश्वविद्यालयां रा कुलाधिपति हरिभाऊ बागड़े अर केन्द्रीय कानून मंत्री अर्जुनराम मेघवाल ई शामिल व्हेला। ई दौरान शोध पूरो करण वाळा 46 जणा ने पीएचडी अर साल 2024 मांय पास व्हेवण वाळा 1 लाख 20 हजार ऊं बत्ता विद्यार्थियां ने उपाधियां दी जावेला। ई सागे ई 65 विद्यार्थियां ने सोना रा तमगा दे र नवाजा जावेला।

000

जयपुर रा जिला कलेक्टर रा दफ्तर मांय आज जिला रा प्रभारी अर विधि मंत्री जोगाराम पटेल जिला विकास पुस्तिका रो विमोचन कीनो। ई मौके वे कह्यो के **“बढ़ता राजस्थान—हमारा राजस्थान”** केवल नारो नहीं, बल्कि राज्य सरकार री मजबूत इच्छाशक्ति, सुशासन री सोच अर जनता रो भलो तैय करण री निशाणी है। मंत्री कह्यो के आ पोथी सरकार री उपलब्धियां अर जनता रा भला ऊं जुड़्या फैसलां रो पूरो कागज है। श्री पटेल आज ही जयपुर मांय **‘लीगल ऑफिसर पोर्टल’** री ई सुरुआत कीनी। ई मौके वे कह्यो के ई पोर्टल रे जरिये कर्मचारियां ऊं जुड़ी जाणकारी असरदार तरीका ऊं हिफाजत सागे राखी जा सकेला।

000

प्रधानमंत्री नरेन्द्र मोदी आकाशवाणी ऊँ हर महीना प्रसारित कर्या जावण वाळा खास कार्यक्रम मन की बात मांय 28 दिसम्बर दीतवार ने विचार बतावेला। आ ई कार्यक्रम री 129वीं कड़ी व्हेला। ई सारु आप ई मुफ्त नम्बर 1800—11—7800 माथे राय दे सको हो। ई सागे ई नरेन्द्र मोदी एप अर माय जीओवी ओपन फोरम रे जरिये ई 26 दिसम्बर ताई विचार भेज्या जा सके है।

000